

永和縣志卷八

名宦傳

邑志之傳名宦卽備國史循吏之採也永邑古今賢吏訪諸父老相傳或以捕盜名或以聽訟著或以興學稱或以立教顯其政績均不可泯要皆愛民如子與之同休戚者非獨縣令可以褒揚卽廣文佐貳中如有輔佐在民與古循吏同風者亦可採錄不然後來者無所興感將何以重視職守而軫念民瘼乎作名宦傳

唐

甯嘉勗 進士聖曆三年爲永和丞愍懷被害宮府僚吏莫

敢近昂解衣懸首號哭時人義之宗楚客聞而大怒收付獄
尋卒睿宗初贈永和縣令後陞級

元

段勝聞喜舉人元末爲永和訓導教養士子無間寒暑邑
人感德不忍去後卸任卽入永興里民籍

明

徐大榮洪武初年任永和主簿見城垣不備惟有繚牆從事
修築艱苦備嘗後人稱頌祀名宦

李昇盭厓人洪武初舉明經任永和知縣因秋霜殺禾據
實呈報請賑獲罪降五台典史後百姓因誠實耐勞訴於朝

特詔陞夔州府知府祀名宦

辛 耀卽墨舉人洪武二十三年以工部給事中授永和知縣廉明正直爲政重農桑與學校迭升陝西按察祀名宦

陳敏祥交趾清化府永寧舉人宣德十年訓導學行優長師道尊嚴稚懷高趣多托題詠以見志九年考滿升本學教諭景泰七年任滿乞休因兵革不可歸占籍於永詔給原俸終其身祀名宦

胡 貞扶風舉人正統五年知縣潔身蒞政舉動準禮修學校築城郭復捐俸買牛數百頭以給貧民耕養功德不鮮因祀名宦

管 清餘姚人正統間縣丞修理學校有功祀名宦

穆 恭宿州舉人成化間知縣持身廉介愛民若子嘗巡南畝集農夫與論耕桑樹畜等事民力有不足者捐俸買牛以助之士民被澤至今稱頌祀名宦

劉 欽館陶舉人正德年訓導持身清廉聚集多士朝夕督誘雖隆冬盛暑不倦歷六年士多有繪像崇俸者祀名宦
吉顯東長安舉人正德十六年知縣賦性剛直蒞政勤敏周貧乏助婚喪邑人至今稱之祀名宦

陳 鈞祥符舉人嘉靖八年知縣居心仁慈蒞政勤敏撫恤窮黎振勵士風祀名宦

郝聰柏鄉恩貢嘉靖十五年知縣實心爲民歲旱禱雨卽應祀名宦

賈執中威縣拔貢嘉靖十五年訓導師範尊嚴雅善作人歷任五年升五台縣教諭諸生依依不忍別祀名宦

王琮鈞州貢生嘉靖十七年教諭歷任頗久清苦如常涵養深邃陶育多士晚節尤極恬退祀名宦

方琮固原貢生嘉靖教諭外和內剛公正樸實士子貧乏者却束脩婚喪不舉者助之恩義兼盡士多感戴祀名宦
曹文輝安甯舉人嘉靖三十五年知縣賦性嚴明人不敢犯重學校緩催科士民德之祀名宦

永和縣志
卷八
閣 威歸德監貢嘉靖間訓導實心廉恕日聚諸生講習卒
於官諸生如喪自親祀名宦

張守禮國子監嘉靖四十五年知縣公正廉明因縣城東無
門始開東門跨山爲城祀名宦

楊自然平度州歲貢隆慶四年知縣存心廉介敷政公平除
革俗弊嚴禁差役勒索士民頌之祀名宦

戴來聘直隸昌黎生員萬曆三十六年任永和關巡檢任滿
因嚴已寬人囊空不能歸里後人入仙芝里民籍祀名宦余
建隆開化歲貢萬曆間知縣操履貞嚴愛民實深踰年致仕
束裝無具隰川守牧親臨祖餞忽報地陷得宋古錢一窖守

牧曰此天爲廉吏賜也命市之以爲資斧一僕負傘徒步而歸見者莫不嗟嘆祀名宦

冀之元山東拔貢崇禎九年知縣愛民勤勞時豺狼成羣食人甚衆公躬親郭外祭禱卽止祀名宦

清

鍾夢豹宛平人順治元年典史六年賊至吏逃民懼避之夢豹獨誓堅守城陷不屈而死邑人痛悼追祭不已遂奏朝追贈知縣省祀忠烈祠

武士豪正定縣進士順治十二年知縣立社造土城垣廟宇無不修葺祀名宦

王爾楫安陸舉人康熙年知縣見城西南舊有水口與石洞均破壞工程浩大白捐俸金二百兩指定鋪捐令捕官章瓚陰陽官薛錫澤督工修建石洞並立鐵柱放水碑全城暴雨之水皆由此出庶免冲塌之害邑人賴以安堵祀名宦

陳極魏縣附生康熙三十四年典史歷任十六年孔然孤宦廉介不易士民頌之祀名宦

王士儀銅江進士康熙四十五年由翰林院庶吉士改授永和知縣性情剛直廉明清正時邑乘舊本殘缺亟應修理適值平陽修府志奉調協修公悉心採察府志內載永和事蹟者詳錄之回永以補其缺又城垣塌毀不堪西城更甚遂提

倡捐修復於城西創建閣曰迎芝於西北城角建亭曰望農以補城西之低覆東南城角建催鳴亭並建修蓮池書院靈液亭課士勸農省刑薄歛種種政澤民營懷之祀名宦

王續先舉人雍正年任知縣品端學優多士景從祀名宦

葛周玉大興翰林嘉慶年任知縣敦崇廉孝政教均著維持風化治理一新祀名宦

許岳湖北舉人道光年知縣廉正有爲聽斷明決勤考課勸農桑政績多端士民至今稱頌祀名宦

宋培芳貴州甕安舉人道光二十年知縣實心實政在任十年治績卓然重修文廟學宮文昌閣魁星樓善政甚多卒於

任邑人不忍去留葬城西山閣場士民隨時祭掃祀名宦

陳迪恪山東優貢同治三年知縣廉明正直邑人愛戴

龔元著山東舉人同治二年知縣博學善書課士治民勤公
中正邑人頌之

廉隅旗下進士同治四年由翰林院庶吉士改授永和知縣
廉正自持慤懃課士士子多受教益政績甚多士民稱頌

王 珊漢軍旗舉人同治五年知縣時陝西匪亂公廉介自
矢剛斷有爲却供應裁陋規減僕從治奸吏剔蠹役百姓均
占實惠臨行泣留脫靴立碑以志不忘祀名宦

鄭 灝大興廩生同治七年補永和知縣操守嚴正實心愛

民任永持久深得民心邑人攀轅泣留至今稱之祀名宦

陳仲貴山東人光緒二年由黎城縣調任嗣值秋禾被旱成災人民惶恐異常公卽親履入鄉逐處勘查災情迭次稟請緩征地丁開倉放賑祀名宦

秦自昌江蘇無錫解元光緒二年永和知縣蒞任時正值災民待哺在急於城設廠散飯暫濟眉急又親履區村挨門逐戶實地檢查分別極次貧民稟請急賑以救災黎憂勞成疾三年春任故臨行地方人民咸爲泣送頌聲不已祀名宦

趙英璧河南濟源縣舉人光緒三年知縣下車時正災民啼飢號寒嗷嗷待哺公署書役多皆餓斃公異常憂痛當將常

平社義倉儲谷盡數散放稟請當道拔發糴米高粱小米數千石由平陽領回按口散給全活災黎甚衆至後年成轉豐接辦善後事宜復提倡學務課士勸農竭力治理績勞病故束裝無具經邑紳稟懇上憲憐恤百金歸行時邑人攀轅臥轍號泣扶送百里之外功德在民至今稱贊不已祀名宦

姚漢卿太原縣舉人同治八年訓導整理學校訓課士子不厭不倦功課無論寒暑不容間斷近二十年如一日造就學子甚衆士林深感德教祀名宦

馬鑑廣西進士光緒七年知縣賦性和平辦事果斷修理倉儲買還倉谷盡力維持旋調補稷山

石正榮湖南永綏廳舉人光緒九年由洪洞調補永和知縣
操守嚴明遇事卽廣詢博採務持其平樸素無比隨時在外
查察民隱如有訴訟案件隨處判斷明決每食總以小米爲
主在任十年邑人欽頌不已

聶昭潛江西進士光緒二十三年知縣學深書佳對民忠厚
在任數年卽授奉天知府

王銜江蘇吳縣附生光緒二十九年知縣忠厚勤儉聽斷
明決邀集士紳籌款將舊城守營署改建蒙養學堂造就學
士人民稱頌

屠仁彬湖北孝感副貢光緒三十二年知縣嚴明剛正吏畏

民懷勸辦水利提倡學校捐廉積谷頌聲載道

民國

清 治旗人國子監副貢由前清知府改就知事民國二年蒞任勤慎寬厚人民感戴不及二年奉調新絳

溫鍾洛浙江瑞安薦任職分發民國四年知事精明強幹尙有政聲

黃庭槐湖北鐘祥優貢民國五年知事才優學富勤政愛民聽斷力主和平時值陝匪郭堅擾亂督飭巡警晝夜防範地方賴以安堵待遇掾屬尙能推心置腹講演新政苦口婆心動輒連篇累牘聳人聽聞並立洗心社定期講演其他政績

多有可述嗣調聞喜永邑士民至今稱頌

張第才直隸滿城拔貢民國十年知事風度端正臨民以禮對於六政極力推行纏足惡習大見改良每遇星期日在高小校講授經書生徒多受教益雙山道路崎嶇人馬行走不便提倡修理以利行旅又精通醫術遇民人有疾病者施方療治藥到回春至今頌聲不已

韓甲三晉城縣人薦任職任用民國十一年知事賦性嚴正役畏民懷對于烟賭等事極力禁止雷厲風行曾經肅清蒞任未久旋調垣曲

永和縣志卷九

名賢傳

名賢之人志潔行芳心純學正著其實不著其名跡其真不跡其僞其有裨於人心世道者多矣吾永地雖彈丸河山磅礴靈秀毓鍾英才賢哲亦嘗間世而出儀型後進者良不乏人現當世變紛紜之際人心思治咸昔賢流風遺澤不盛歎羨故特表其行彰其德則磊落奇特之士將相率而出永邑有不早臻郅治者哉作名賢傳

唐

劉和官至兵部尚書上甚善之拜建節將軍賜爵成紀侯